

Liklik nius long

*prea,*

*givism na go*

## EBC Wok Misin

NIUSLETA NO. 66 JULAI 2018

### DIA OL PREN BILONG WOK MISIN!

Mipela i amamas long salim dispela niusleta No. 66 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 29 Julai, 2018. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

#### Adres bilong salim mani:

EBC Overseas Mission  
BSP Goroka Branch  
No. 1000 751 861

#### OI Fild Adres:

**Mike Kaire**  
EBC Community Service  
P.O. Box 250, Dili, East Timor  
Mobile: (00) 670 77757402  
Email: mikekaire@gmail.com

#### Sifu Family

STT BMW Papua  
Nabire 98802  
HP: 0852-1357-0016/  
0812-48620-831  
Phone: (+628) 124 8620831  
Email: sifuutina1@gmail.com

#### Missions Mobiliser

Muko Aveo  
missions.mobiliser.ebc@gmail.com  
Mobile: 72681881

#### Liklik nius long EBC Wok Misin

Design & Printing by:  
EBC Publications Department, Lae

Dia ol bratasusa,

Mipela i amamas tru long bringim yupela narapela nius long wok misin bilong yumi insait long PNG inlan na ovasis misin.

God i no laik bai wanpela manmeri o pikinini i lus long de bilong kot bilong en.

Laikim na sori bilong God i soim yumi long wok bilong Jisas long diwai kros.

***God i gat wanpela Pikinini tasol i stap. Tasol God i laikim tumas olgeta manmeri bilong graun, olsem na em i givim dispela wanpela Pikinini long ol. Em i mekim olsem bilong olgeta manmeri i bilip long em ol i no ken lus. Nogat. Bai ol i kisim laip i stap gut oltaim oltaim. Jon 3.16***

Dispela laikim bilong God long laip bilong yumi i save kirapim yumi long **prea, givim na go** autim gutnius long arapela manmeri.

***Na nau mi givim nupela lo long yupela olsem, yupela wan wan i mas laikim tru ol arapela. Mi bin laikim yupela tru, na olsem tasol yupela wan wan i mas laikim tru ol arapela. Sapos yupela wan wan i laikim tru ol arapela man bilong lain bilong mi, orait dispela bai i soim olgeta man olsem, yupela i disaipel bilong mi. Jon 13.34-35.***

#### IS TIMOR

Famili Kaire i bin amamas tru long sotpela holide bilong ol hia long PNG.

Ol i bin raun long mekim misin awenes wantaim misin tim long sampela seket insait long 9 Seket.

Tenkyu long God i blesim sotpela taim bilong holide na misin awenes.

Famili Kaire i bin i go bek long Is Timor long namba wan wik bilong mun Epril, 2018.

**Baibel Skul Loes** – Gavman long Is Timor i bin givim tok orait long projek long Loes i kamap olsem wanpela "Fam Trening Senta" long Is Timor. God willing long 2020 taim olgeta projek wok i pinis tru, em bai isi long ol i senisim i kamap Baibel Skul long wanem em i no isi wantaim gavman long statim projek stret aninit long nem "Baibel Skul".

**Yut Kem** – Long Disemba 2017, ol i bin holim nambawan taim wanpela bikpela yut kem we ol i bin bungim 3-pela distrik Likisa, Ermera na Bobonaro. Moa long 250 yangpela i bin kam long dispela kem. Brata Mike wantaim ol arapela i go pas long autim Tok bilong God na Bikpela i bin blesim tru na planti yangpela i bin stretim laip bilong ol. Tenkyu tru long prea bilong yupela.



**Borai (EBC Sios)** – Tenkyu tru long prea bilong yupela, wok i gro, na kongrigesen tu i wok long gro na i gat nid long skruim hauslotu namba tu taim yet. Sampela lain long ol arapela sios i tokim ol Kristen long Borai olsem, "Mipela i save mangal tru long yupela". God i kisim biknem na yumi ken go on long prea inap God i ken yusim kongrigesen long Borai long toktok moa yet long ol arapela manmeri.

Susa Mangen i helpim long nupela kindegaten skul long Borai yet.

Mipela i givim moa taim long nupela projek long Loes, bihain bai kamap Baibel Skul. Mipela tu i sapotim wok namel long Independent Protestant Timor Leste (IPTL – Independen Protesten Sios long Is Timor) na hap taim na han tu i go sapotim nupela sios bilong yumi yet long Borai. Wantaim prea bilong yupela, God i save strongim mipela long mekim wok long hia.

**Visa** – Brata Mike na susa Mangen i pulimapim aplikesen long kisim nupela visa. Plis prea, God i ken helpim na ol i ken kisim visa gen.

### NABIRE

Famili Sifu i prea na wet yet long Vanimo inap God i opim rot long kisim visa. Sampela rot mipela i bin ting bai i op long kisim visa tasol dispela rot i no op. Bihain long holide bilong famili Sifu hia long PNG, ol i bin lusim Kainantu long mun Mas long i go bek long Nabire long Wes Papua tasol rot long visa i no bin op.

Ol SIL i traim long helpim yumi long stretim visa na mipela i askim yupela long prea inap God i opim rot. Long neks niusleta bai mipela i toksave olsem ol i kisim visa o nogat.

Wanpela Baptis sios kongrigesen long Nabire we famili Sifu i save lukautim wantaim Sandeskul bilong ol i krai na singaut yet long famili Sifu i mas i kam bek kwik. BMW Baibel Skul we famili Sifu i save helpim i pundaun na ol i wari long famili i mas kam bek long wok. Yumi ken prea inap laik bilong God yet i ken kamap na em bai givim bel isi long famili Sifu, ol lain long Nabire na long yumi olgeta.



### MISIN LAUNSAUT KOS – OROBIGA

Long mun Epril, olgeta misin kodineta long 17 seket i bin kamap long Orobiga. Mosbi na Jimi Seket tasol i no bin kam. God i helpim na ol i lainim planti gutpela samting bilong helpim na kirapim wok misin insait long seket bilong ol yet. Tenkyu long prea, God i blesim dispela kos na planti salens i



kamap. Moa yet, “Olsem wanem long ol lain Esia i pulap long PNG? Yumi kolim ol “kongkong” na bagarapim ol tasol inap long yumi autim gutnius long ol tu o nogat?”

### PNG INLAN WOK MISIN

**Tari** – Bihain long bikpela bagarap bilong graun guria long Tari, ol manmeri i opim bel bilong ol long harim gutnius. Wanpela tim bilong EBCPNG wantaim tim long Kugark seket i bin bringim sampela kaikai na wara tenk samting bilong helpim ol manmeri long Tari. Planti taim ol Tari i save lukim ol man i go bilong kisim oil na gas tasol nau God i opim ai bilong ol long lukim ol dispela brata i go givim tupela kain helpim long bodi na spirit wantaim. God i blesim tru dispela autris na Em yet i kisim biknem.



**Boda na Green River** – God i helpim brata Kennedy na tim bilong en na ol i save patrol long boda bilong Wes Papua na PNG. Tenkyu long God i helpim na wanpela prea haus i sanap pinis long graun bilong ol Wes Papua long boda stret. Hangre bilong harim gutnius i stap na planti

singaut i kamap long Wes Papua. Yumi ken prea inap God i ken salim planti wokman i go.

**Green River/Vanimo** – Dispela ples em i pulap long kain kain animism bilip tasol God i helpim sampela bratasusa long Kugark i stap pinis long dispela hap na autim gutnius. Yumi laik prea planti long wok misin long Green River na husat i stap pinis long hap long autim gutnius.

Tingim tu ol arapela nupela autris ples i wok long op insait long wanwan seket bilong yumi. Yumi stap long inapim promis bilong Jisas. Jisas i tok pinis, **“Gutnius i mas i go long olgeta hap graun na olgeta manmeri bai i harim na bihain tasol bai las de i kamap.” Matyu 24.14**

God i singautim yumi long inapim dispela promis tasol yumi tu i laik was gut na mekim wok.

### SAMPELA TENKYU NA ASKIM POIN

- ☞ Tenkyu long dua i op long Is Timor
- ☞ Tenkyu God i opim kain kain dua long autim gutnius.
- ☞ Tenkyu long God i save harim prea long hevi bilong wok misin.
- ☞ Tenkyu long God i opim autris dua long boda.
- ☞ Prea long visa bilong Mike na Mangen na long registresen long EBC Community Service.
- ☞ Prea long God i givim strong long ol wokmanmeri long Is Timor.
- ☞ Prea long visa bilong famili Sifu.
- ☞ Prea long God i ken lukautim wok long Nabire.
- ☞ Prea long olgeta Misin Kodineta, God i ken strongim ol long wok.
- ☞ Prea long ol Tari lain i ken tanim bel.
- ☞ Prea long wok misin long Boda na Green River.

Tenkyu tru long stap wantaim mipela long nius bilong wok misin. God i ken blesim yupela olgeta long karim hevi bilong autim gutnius, long prea, givim na go.